



e-bilten

OPĆINA TEŠANJ

www.opcina-tesanj.ba

e-mail: fuad.sisic@opcina-tesanj.ba

Petak
Broj 60

14.11.2011

1. Sramota jeste naša ali nije naše vlasništvo
2. Korak po korak
3. Sila i dominacija
4. Treća traka bez treće brzine
5. Budžet 2012

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu:

fuad.sisic@opcina-tesanj.ba

Molimo vas da ovaj elektronski bilten prosljedite svim zainteresiranim u našoj općini. Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću.

Sa zadovoljstvom očekujem vaše komentare, sugestije i primjedbe.

Molim da ne prinatate ovaj sadržaj. Za svaki nepotrebno odštampan papir mora se bez potrebe oboriti drvo koje raste!

Sramota jeste naša ali nije naše vlasništvo

Grad na gubitku

U ponedjeljak, 31. oktobra ove godine, ispred zgrade Općine me susreo jedan sugrađanin starijih godina i kaže: *Načelniče sramota da ja u ovim godinama nemam gdje kafe popiti. Daj napravi ovaj hotel, neka ostane zapamćeno da si ga ti napravio!*"

Odgovaram: ako Bog da biće, napraviće se, ta lokacija je sada privatno vlasništvo. Sramota jeste naša ali nije vlasništvo naše. Mnogo prioriteta a lokalni budžet ne može to kupiti. Ako bismo to uradili morali bi zaustaviti druge važne projekte koji se oslanjaju na budžet.

Sugrađanin: *sramota je to!*

Prolazim i ne odgovaram dalje. Mislim stvarno je to sramota i pitam se šta možemo? Krajem 2009. godine smo uradili jedno rješenje, nekako smo pridobili i vlasnika da u roku 12 mjeseci dođe do građevinske i početka radova, ali onda na Vijeću negodovanje, poslije sjednice Vijeća kreće prava kampanja protiv iznesenog rješenja. Ponuđeno rješenje nije nudilo smještaj za dva autobusa putnika, kako neko reče u svojoj diskusiji, a Grad treba adekvatan hotel. Slažem se, ali to što je adekvatno Gradu nije vlasniku – investitoru. Ipak, ovdje je nužan konsenzus, pa krenućemo ponovo.

Tako je i bilo, i prije nekoliko mjeseci smo dobili novi prijedlog koji na Vijeću nije imao većih zamjerki, ali vlasnik – investitor nije tim oduševljen. Sada vlasnik hotela radi novi prijedlog, spreman je na proljeće krenuti s radovima na hotelu ako Općina podrži takvo rješenje. Došli smo do tačke na kojoj ista projektantska kuća - Arhitektonski fakultet u Sarajevu priprema rješenje po zahtjevima vlasnika. Pokušavamo doći do zajedničkog minimuma i do kraja godine izaći na Vijeće sa ovim prijedlozima.

Hoće li Općinsko vijeće imati snage da preuzme odgovornost ili će se ponovo sve odmotati, pred nama je. Pred nama je prilika da ne bude više naša sramota, iako se i sada kahva ima gdje popiti.

Ipak, novi hotelski smještajni kapacitet ćemo, izvjesno je već sada, naredne godine imati. U prostoru firme *Ukus*. Poduzetni Namik Širbegović je inovirao sadržaj lokacije nekadašnjeg *Ukusa*, uposlio ljude, osigurao ponudu a sa partnerima iz Slovenije počinje gradnja u okviru ovog kompleksa i hotelskog smještaja.



Korak po korak

Grad na dobitku

Kada postoji volja, kreativnost, hrabrost, odlučnost onda se mnogo može uraditi. Nekima je teško kamen pomjeriti s puta, a neki pomjeraju stijene i otvaraju novi životni prostor. O nama će svjedočiti ono što ostane iza nas napravljeno, promijenjeno, poboljšano a ne ono što smo zaustavljali. Pri tome je još važnije šta postajemo tokom tog procesa, bolji ili lošiji ljudi!

09.07.2009



01.11.2011



Sila i dominacija

Moguće velike ekonomske i političke posljedice po općinu Tešanj!?

Ostaće zapisano u arhivskoj građi Općine Tešanj da je jedan mladi vijećnik, koji je obnašao i dužnost Predsjedavajućeg OV Tešanj, u žaru borbe za interese svoje partije otišao tako daleko i zaprijetio lokalnim organima vlasti na posljednjoj sjednici Vijeća. Prevedeno na narodu potpuno razumljiv jezik, ta prijetnja zvuči ovako: ***Usudite li se odlučiti onako kako se ne sviđa mojoj Partiji, bez obzira što je to vaša nadležnost, vaše ovlaštenje i vaša odgovornost, ja vas upozoravam da su moguće ozbiljne posljedice po općinu Tešanj. Zar niste svjesni da je Moja Partija sada „gore“ na vlasti.***

U prvi mah nisam mogao povjerovati u ono što čujem. Moja očekivanja su postala moj problem. Ja sam mislio kako se Njegova Partija ipak transformisala, te da Država za Čovjeka znači jačanje institucionalnog okvira djelovanja a nikako prijetnja sa dužnosnicima iz Njegove Partije. Pitao sam se i kako ću pred „sud“ moje stranke tamo gdje su moja stranka i Njegova Partija zajedno u vladi!? I hoće li moja stranka „gore“ radi „viših“ interesa kazati nama da smo trebali slušati to na šta nas mladi kolega upozorava?! I dok sam u sekundama razmišljao brzinom koja se teško može izmjeriti, u misli mi je došla scena iz Skupštine Republike Bosne i Hercegovine 1992. godine. Tada smo čuli prijetnje upućene republičkoj vlasti, bile su to strašne prijetnje sa stravičnim posljedicama. Valjda je to ostavilo traga na nama, proživjeli smo teške traume da više ne podnosimo prijetnje. Kada to čujem onda me nije briga ni šta će uraditi Njegova Partija, ni šta će reći moja stranka. Nije me briga jer mi je stalo do nas. Nije mi stalo do vlasti, mogu hvala Bogu mirne duše i čista obraza odmah otići iz vlasti. Ali ne mogu ostati u vlasti i tapšati po ramenima drugove moje koji kada govore onda kažu pola istine a pola onoga što nije istina, koji kažu jednu stvar pred jednim brojem ljudi a onda pred još većim brojem kažu da to nisu rekli, ne mogu ostati u vlasti i ne poduzimati ono što je ispravno makar bilo teško, i makar se mojim drugovima i ne sviđalo. Ali ne zna moj mladi kolega da sam ja veoma dobro saradivao sa drugovima iz Njegove Partije kada Partija na višim nivoima vlasti nije imala nikakav uticaj. Moj drug iz Njegove Partije bio je i Predsjedavajući Vijeća kada sam ja bio općinski načelnik, a moja stranka imala 70% vijećnika u Vijeću. I moj drug iz Njegove Partije nije bio smijenjen sa pozicije Predsjedavajućeg, nije bilo za to ni razloga jer je moj drug i prijatelj iz Njegove Partije znao granice međusobnog poštivanja i uvažavanja, i znao granice institucionalnog djelovanja. Tek nakon toga slijede partikularni partijski i stranački interesi. Prije toga, ako se pojave, nanose štetu svima. Nešto se krupno dogodilo sa Njegovom Partijom, ali na žalost, izgleda da nije na bolje. Nije bar na lokalnom nivou. Ostali su samo drugovi, prijatelja više nema. Ali nema ni granica. Nema ni poštovanja i uvažavanja.

Mladi ljudi treba da pokažu mnogo više tolerancije i razumijevanja, to se očekuje i to je moguće. To što ovaj mladi vijećnik pokazuje takvu vrstu nadmenosti i daje loš primjer drugima, nije moguće opravdati.



Treća traka bez treće brzine

Konačno okočana

Svi projekti su važni, neki imaju specifičan interese, neki manji ili širi interes. Nema sumnje da je projekat izgradnje treće trake u industrijskoj zoni Bukva specifičan po tome što znatno otklanja problem velikih gužvi, ali otvara nove mogućnosti i prilike za investicije. Koliko god su privrednici u Bukvi imali pozitivan stav spram ovog projekta, toliko su bili uznemireni sporim izvođenjem započetih radova druge faze ove trake. U jednom trenutku me jedan od vlasnika kompanije iz Italije pitao o čemu se radi? Odgovorio sam da, iako bih mu sve objasnio, ne vjerujem da bi mu bilo lakše pa čak ni mnogo jasnije, jer se jednostavno radi o krajnje kompliciranom sistemu vlasti u pojedinim oblastima. I zaista je tako.

Ipak, okončana je druga faza izgradnje treće trake. Ostaju još tri faze u narednom periodu. Treća prema Koteksu, četvrta prema kružnom toku i peta prema budućoj petlji na koridor Vc. Sve što se počne i završi se, treba ići dalje. Ostaje da vidimo hoćemo li morati usporavati saobraćaj fizičkim zaprekama („ležećim policajcima“), ili će vozači pokazati odgovornost da trećom trakom ne prelaze u prebrzu vožnju.

Nacrt budžeta 2012

Javna rasprava u toku

Ambijent u kome se kreira budžeta za 2012. godinu liči pomalo na onaj kada se kreirao budžeta za 2009. godinu, iako su okolnosti znatno drugačije. Naime, hipotekarna kriza u Americi početkom 2008. godine prenijela se na finansijsku krizu a ubrzo i na realni sektor ekonomije što su mnoge lokalne kompanije znatno osjetile u smanjenim narudžbama i plasmanu svojih proizvoda na ino-tržišta. Stigao je budžet 2010. godine sa znatnim oprezom zbog najavljivanog „duplog dna“ svjetske krize ali i nadom u oporavak, što se pokazalo uskoro rastom narudžbi proizvodnim kompanijama. Budžet za ovu, 2011. godinu je ipak bio sa mnogo manje straha i rizika, i oporavak je bio potvrđen a finansijski sektor se ponovo okrenuo prema kupcima: građanima i firmama kroz povoljnije kamate. Velika kriza u Grčkoj je uzdrmala EU, ali više od toga čini se strah da bi Italija mogla imati velike probleme, Španija također.

Ipak, jasno je svima da trenutno najveći interes za EU ima Njemačka, jer njena je privreda najkonkurentnija i prije svega njihova je prednost imati tržište od 500 miliona ljudi. Tu je i Francuska, Velika Britanija. Ali je pitanje kolika je stvarna njihova snaga, ili još bolje, iz čega ili od koga crpe svoju snagu?

Za nas i nije odgovor toliko bitan, jer mi ne možemo uticati na ta kretanja, ali možemo brinuti, biti oprezni i racionalni, te biti spremni za godinu punog oporavka ali i za godinu u kojoj bi se mogla živjeti obnovljena kriza. Kod nas su lokalni izbori, razlog više za odmjeren pristup u kome treba svakako održati i dugoročnu stabilnost lokalnog budžeta.

Općinski načelnik
Fuad Šišić

